

摘藻堂四庫全書薈要

經部

欽定四庫全書薈要

經部

欽定禮記義疏卷十一



詳校官編修臣程嘉謨

欽定四庫全書薈要卷二千四百七十四

經部

欽定禮記義疏卷十一

檀弓上第三之三

食於有喪者之側未嘗飽也

應氏鏞曰食字上疑脫孔子二字

正義鄭氏康成曰助哀戚也

通論游氏桂曰子食於有喪者之側未嘗飽也蓋古禮有是而夫子能行之耳所謂車中不內顧不疾言不親指子於是日哭則不歌皆禮之常非聖人創為

之也

曾子與客立於門側其徒趨而出曾子曰爾將何之曰
吾父死將出哭於巷曰反哭於爾次曾子北面而弔焉
正義鄭氏康成曰徒謂客之旅以為不可發凶於人
之館故出哭於巷次舍也

陳氏澣曰謂其人
所寓之館舍也

禮館人

使專之若其自有然

通論孔氏穎達曰此論館客使如其已有之事禮喪
主西面今曾子北面弔者案士喪禮主人西面其賓

亦在門東北面此謂同國之賓也今曾子既許其反哭於次舍之處故以同國賓禮北面弔焉

存疑陳氏澔曰徒門弟子也

案徒當從注出哭者以館舍統於尊者不敢以已喪驚也爾次徒之室不於客之正室客非喪主亦避尊也

孔子曰之死而致死之不仁而不可為也之死而致生之不知而不可為也是故竹不成用瓦不成味木不成

斲琴瑟張而不平竽笙備而不和有鐘磬而無篳篥其

曰明器神明之也

知音智味依注音沫亡曷反斲陟角反竽音于和胡臥反篳息允反虞音

巨

正義鄭氏康成曰之往也死之生之謂無知與有知

也為猶行也成猶善也

胡氏銓曰謂完備也

竹不可善用謂邊

無滕

孔疏謂竹器邊無滕緣也

味當作沫沫醕也

孔疏醕醕面証沫有光澤瓦不

善沫瓦器無光澤也

不平不和謂無宮商之調無篳篥不縣之

也

孔疏不用格縣掛之

橫曰篳直曰虞神明之者言神明死者

也神明者非人所知故其器如此 何氏脩曰不仁不知之間聖人之所難言若全無知則不應用若全有知則亦不應不成故有器不成付之不測之境也

孔氏穎達曰此論生人於死者不可致死致生之事聖人為教使人子不死於亡者不便謂無知不生於死者不便謂有知故制明器以神明求之器用竝不精善也 劉氏曰之往也之死謂以禮往送於死者也往於死者而極以死者之禮待之是無愛親之心

為不仁故不可行也往於死者而極以生者之禮待之是無燭理之明為不知故亦不可行也此所以先王為明器以送死者竹器則無滕緣而不成其用瓦器則麤質而不成其黑光之沫木器則樸而不成其雕斲之文琴瑟則雖張絃而不平不可彈也箏笙雖備具而不和不可吹也雖有鐘磬而無縣挂之簏廡不可擊也凡此皆不致死亦不致生而以有知無知之閒待死者故備物而不可用也備物則不致死不

可用則亦不致生其謂之明器者蓋以神明之道待之也

通論陳氏祥道曰不曰神明之器特曰明器者以神之幽不可不明故也周官凡施於神者皆曰明故水曰明水火曰明火以至明盥明燭明寯者皆神明之也蓋其有竹瓦木之所用琴瑟竽笙鐘磬之所樂者明之也所用非所用所樂非所樂神之也宋襄公葬其夫人醯醢百甕豈知此哉

案事死如事生者人子之至情也而神道或異於人道始死之奠猶近於人之及葬則近於神之故凡所以事死皆在人與神之間又以致敬而不敢褻也

有子問於曾子曰問喪於夫子乎曰聞之矣喪欲速貧死欲速朽有子曰是非君子之言也曾子曰參也聞諸夫子也有子又曰是非君子之言也曾子曰參也與子游聞之有子曰然然則夫子有為言之也曾子以斯言告於子游子游曰甚哉有子之言似夫子也昔者夫子

居於宋見桓司馬自為石槨三年而不成夫子曰若是其靡也死不如速朽之愈也死之欲速朽為桓司馬言之也南宮敬叔反必載寶而朝夫子曰若是其貨也喪不如速貧之愈也喪之欲速貧為敬叔言之也曾子以子游之言告於有子有子曰然吾固曰非夫子之言也曾子曰子何以知之有子曰夫子制於中都四寸之棺五寸之槨以斯知不欲速朽也昔者夫子失魯司寇將之荆蓋先之以子夏又申之以冉有以斯知不欲速貧

也

問喪問或作聞喪息浪反朽許久反為于偽反朝置遙反

正義鄭氏康成曰有子孔子弟子有若也夫子卒後

問此庶有異聞也喪謂仕失位魯昭公孫於齊曰喪

人其何稱

孔疏引公羊證失位者稱喪也昭公孫於齊次於陽州齊侯言公於野井昭公曰喪

人其何稱有子以貧朽非人所欲故以曾子所答為非君

子之言桓司馬宋向戌之孫名魋

孔疏世本戌生東鄰叔子超超生左

師眇眇即向巢也魋是巢之弟故云向戌孫也

靡侈也敬叔魯孟僖子之子

仲孫閱蓋嘗失位去魯得反載其實來朝於君

案家語敬

叔以富得罪於定公奔衛衛侯請復之載其實以朝
夫子曰若是其貨也喪不如速貧之愈富而不好禮
殃也敬叔以富喪矣而又弗改吾懼其有
後患也敬叔聞之驚懼謝過循禮施散

中都魯邑

名

案中都地後入於齊名平陸

孔子嘗為之宰為民作制孔子由

中都宰為司空由司空為司寇將之荆將應聘於楚
先之以子夏申之以冉有言汲汲於仕也 孔氏穎

達曰此論喪不欲速貧死不欲速朽之事有子唯問
喪不問死曾子以喪死俱為惡事貧朽又事類相似
故遂言之 陳氏澔曰將適楚而先使二子繼往者

盖欲觀楚之可仕與否也

辨正孔氏穎達曰孔子世家定公九年孔子年五十
為中都宰由中都宰為司空由司空為司寇定公十年
會於夾谷攝行相事此云司寇者崔靈恩云諸侯三
卿司徒兼冢宰司馬兼宗伯司空兼司寇三卿之下
則五小卿為五大夫司徒之下立二人小宰小司徒
司馬之下以其事省立一人為小司馬兼宗伯之事
司空之下立二人小司寇小司空今夫子為司空乃

小司空從小司空為小司寇也案魯有孟叔季三卿
為政又有臧氏為司寇似崔解可依也世家魯定公
十四年齊人歸女樂孔子去魯適衛從衛之陳又反
於衛過曹適宋適鄭適陳又適衛不見用將西見趙
簡子至河又反於衛復行如陳時哀公三年孔子年
六十明年自陳遷於蔡楚使人聘孔子陳蔡圍之絕
糧於是使子貢至楚楚昭王興師迎孔子將封之子
西諫而止是歲昭王卒孔子自楚反於衛年六十三

時哀公六年以此言之失司寇距之楚歲月甚遠非
謂失司寇之年即之荆謂失司寇之後將往之荆爾
方氏孝孺曰仕非欲富為行道也棺槨非欲不朽
為廣孝也 何氏孟春曰孔子欲仕為行道若謂欲
富而瞰且趨焉以求利於蠻夷之國非孔子所為檀
弓所載亦傳聞之繆

案南宮敬叔載寶事未必確然如家語所載一聞聖
言驚懼謝過循禮施散正可見古人改過之勇徙義

之力

陳莊子死赴於魯魯人欲勿哭繆公召縣子而問焉縣
子曰古之大夫束脩之間不出竟雖欲哭之安得而哭
之今之大夫交政於中國雖欲勿哭焉得而弗哭且臣
聞之哭有二道有愛而哭之有畏而哭之公曰然然則
如之何而可縣子曰請哭諸異姓之廟於是與哭諸縣
氏

繆音木竟音
境焉於虔反

正義鄭氏康成曰君無哭鄰國大夫之禮陳莊子齊

大夫陳恒之孫名伯

孔疏世本成子當生襄子班班生莊子伯

安得哭之

以其不外交也時君弱臣強政在大夫專盟會以交接不得不哭言哭有二道以權微勸之也哭諸異姓之廟明不當哭 孔氏穎達曰此論哭鄰國臣之法 陳氏澔曰大夫訃於他國之君曰君之外臣寡大夫某死齊強魯弱不容畧其赴縣子名知禮故召問之脩脯也十脰為束問遺也為人臣者無外交不敢貳君也故雖束脩微禮亦不以出竟交政於中國言

當時大夫專盟會之事以與國君相交接也此變禮之由也愛之哭出於不能已畏之哭出於不得已方氏慙曰哭諸異姓之廟者以哭其非所當哭之人故哭於非所當哭之廟也必哭諸縣氏以其禮之所由起故耳

通論陳氏澔曰哭伯高於賜氏義之所在也哭莊子於縣氏勢之所迫也

仲憲言於曾子曰夏后氏用明器示民無知也殷人用

祭器示民有知也周人兼用之示民疑也曾子曰其不然乎其不然乎夫明器鬼器也祭器人器也夫古之人胡為而死其親乎

正義鄭氏康成曰仲憲孔子弟子原憲

案原憲名憲字思古無如

仲於名者或仲氏而名憲與

示民無知所謂致死之有知所謂致

生之兼用言使民疑於無知與有知曾子連言其不然乎非其說之非也蓋仲憲之言三者皆非此或用鬼器或用人器孔氏穎達曰此論不可致意於死

人為死為生之事殷不別作明器而即用祭祀之器
曾子謂夏代文以鬼與人異故純用鬼器非為無知
殷世質以鬼雖與人異亦應恭敬故用祭器貯食送
之非為有知周家極文故兼用之然周惟大夫以上
兼用士惟用鬼器不用人器也又言古人雖質何容
死其親乎若示無知則是死之義也憲言三事皆非
而曾子獨譏無知者以夏代尤古譏其一則餘從可
知也 陳氏澥曰為其無知故以不堪用之器送之

為其有知故以祭器之可用者送之疑者不以為有知亦不以為無知也然周禮惟大夫以上得兼用二器士惟用鬼器也曾子以明器祭器固是人鬼之不同夏殷所用不同者各是時王之制文質之變耳非謂有知無知也若如憲言則夏后氏何為而忍以無知待其親乎 王氏曰仲憲之言皆非曾子非之末獨譏其說夏后明器蓋舉其失之甚者也

存疑張子曰明器而兼用祭器周之末禮也周禮惟

言獻 方氏慤曰明器祭器三代之所兼用蓋處以死生之間而已

案周禮惟言獻先鄭訓陳後鄭訓藏夫器必先陳之後藏之張子據以為周初不用祭器何也至三代皆兼二器方說更無據

公叔木有同母異父之昆弟死問於子游子游曰其大功乎狄儀有同母異父之昆弟死問於子夏子夏曰我未之前聞也魯人則為之齊衰狄儀行齊衰今之齊衰

狄儀之問也

木依注作朱 案古本齊衰下有三月二字

正義鄭氏康成曰木當為朱春秋作戍衛公叔文子

之子定公十四年奔魯

孔疏世本衛獻公生成子當當生文子拔拔生朱故知木

當為朱也其大功乎疑所服也 孔氏穎達曰此論為同

母異父昆弟死者著服得失之事為同母異父昆弟之服喪服無文乎疑辭也不云自狄儀始者庾蔚云狄儀之前魯人先已行之

存疑鄭氏康成曰親者屬大功是 孔氏穎達曰同

父同母服期今但同母宜降一等服大功王肅乃云
其子降繼父齊衰一等故服大功是以繼父齊衰為
期服也 張子曰同母異父之昆弟狄儀服之齊衰
是與親兄弟之服同如此則無分別無分別則禽獸
之道也是知母而不知父齊衰三月高曾正服無緣
加之異姓或以為大功者亦似太過以小功服之可
也

案家語邾人有同母異父之昆弟死因顏克問於孔

子子曰同居繼父則從為之服不同居繼父且無服
况其子乎是聖人固有定論矣何游夏不聞而各以
臆說邪魏高堂崇曰聖人制禮外親不過總殊異內
外之明理也外祖父母以尊加從母以名加皆小功
舅總而已同母異父之昆弟異族無屬於禮不當有
服即同居亦當從同繫總之例無緣大功乃重於外
祖父母也鄭謂親者屬王肅難之言親屬謂出母之
身不謂其子極當然王肅謂繼父服齊衰子降一等

故大功又非也馬昭駁王言繼父昆弟恩由於母不由繼父張融駁王言繼父同居有子為齊衰三月乃為其子大功非服之差合此數說觀之則以孔子言無服為正

子思之母死於衛柳若謂子思曰子聖人之後也四方於子乎觀禮子蓋慎諸子思曰吾何慎哉吾聞之有其禮無其財君子弗行也有其禮有其財無其時君子弗行也吾何慎哉

正義鄭氏康成曰子思孔子孫伯魚之子伯魚卒其

妻嫁於衛柳若衛人也見子思欲為嫁母服恐其失

禮戒之嫁母齊衰期

孔疏嫁母之服喪服無文案喪服杖期章云父卒繼母嫁從為

之服報則親母可知故鄭約云齊衰期也

有禮無財謂時可行而財不足

以備禮有禮有財無時謂財足以備禮而時不得行

者子思謂時所止則止時所行則行無所疑也喪之

禮如子贈祔之屬不踰主人

孔疏若嫁母之家主人貧乏雖有財不得過於

主人故鄭謂贈祔不踰主人也

孔氏穎達曰此論為出母之喪行

禮之事譙周袁準並云父卒母嫁非父所絕適子雖主祭猶宜服期而喪服為出母期嫁母與出母俱是絕族故知與出母同也

通論姚氏舜牧曰喪母有其禮矣致喪有其財矣然時乎出嫁則與從父而終者異矣此雖有禮與財而亦有不可行者他日子上之母死子思曰為伋也妻者是為白也母不為伋也妻者是不為白也母則此之所謂有其禮有其財無其時君子弗行也其意斷

可識矣

存疑游氏桂曰為嫁母服此後世之禮非先王之正也古之君子嚴於父母男女之別以為禽犢懷母不懷父君子惡之故父在為母期以厭降於父母出嫁而其禮之行有所不備以為母絕於天其尊統於父所以致謹於父之尊也若厚於嫁母而於父不親此禽犢之道謹於禮者之所畏也

案嫁母亦有出於不得已而再適者則嫁

母之罪不重於出母為出母期禮有明文矣游氏持論亦似太過

辨正吳氏澄曰禮父在為嫁母齊衰期父沒為父後者則不服其時子思父伯魚久沒祖仲尼亦沒而其已嫁之母死於衛子思將為之服柳若戒以慎禮母或厚於情而踰於禮時母嫁之家蓋貧子思雖欲備禮而不可踰喪主故其心歉然謂吾方恨其不及於禮何事須慎防其過於禮乎馬氏胡氏皆不曉柳若與子思所言慎字之意

縣子瑣曰吾聞之古者不降上下各以其親滕伯文為

孟虎齊衰其叔父也為孟皮齊衰其叔父也

瑣息果反
滕徒登反

為于
偽反

正義鄭氏康成曰古謂殷時也上不降遠下不降卑
伯文殷時滕君也爵為伯名文孔氏穎達曰此論
古者著服不降之義瑣縣子名據所聞而言也周禮
以貴降賤以嫡降庶唯不降正耳而殷世以上雖貴
不降賤上謂旁親族曾祖從祖及伯叔之班下謂從子
從孫之流彼雖賤不以己尊降之猶各隨本屬之親

輕重而服之孟虎乃滕伯之叔父而滕伯又孟皮之叔父言滕伯上為叔父下為兄弟之子皆著齊哀是上不降遠下不降卑也 庚氏蔚之曰上下猶尊卑正尊周禮猶不降則知所明者常尊也鄭恐尊名亂於正尊故變文言遠也

通論朱子曰夏殷而上大概只是親親長長之意到得周來又添得許多貴貴底禮數如始封之君不臣諸父昆弟封君之子不臣諸父而臣昆弟期之喪天

子諸侯絕大夫降然諸侯大夫尊同則亦不絕不降
姊妹嫁諸侯者則亦不絕不降此皆天下之大經前
世所未備到得周公搜剔出來立為定制更不可易
案畧爵而專稱孟虎孟皮者明非諸侯大夫尊同者
也殷道重親故通遠與卑均服之記兩舉上下以盡
其義馬氏晞孟謂滕伯為二孟叔父吳氏澄謂二孟
為滕伯叔父各執一邊古者不降二句都無著落
后木曰喪吾聞諸縣子曰夫喪不可不深長思也買棺

外內易我死則亦然

易以
鼓反

正義鄭氏康成曰后木魯孝公子惠伯鞏之後

孔疏
世本

孝公生惠伯草其後為厚氏世本云草此云鞏世本云厚此云后其字異耳但惠伯子孫無名木者故注

直云買棺外內易此孝子之事非所託

孔疏此是孝
子所為之事

非是父母豫所
屬託譏后木也

孔氏穎達曰此論屬子以死事非

禮之事孝子居喪必深長慮買棺之時當令精好斲

削內外使之平易后木述縣子之言以語其子 馮

氏曰此條重在不可不深長思一句買棺之時內外

皆要精好此是孝子當為之事非是父母豫所屬託
而曰我死則亦然記禮者譏失言也 方氏慤曰子
思曰喪三日而殯凡附於身者必誠必信勿之有悔
焉耳矣三月而葬凡附於棺者必誠必信勿之有悔
焉耳矣此喪所以不可不深長思也買棺外內易亦
其一端耳

曾子曰尸未設飾故帷堂小斂而徹帷仲梁子曰夫婦
方亂故帷堂小斂而徹帷

帷意
悲反

正義鄭氏康成曰斂者動搖尸帷堂為人褻之言方

亂非也仲梁子魯人

孔疏左傳定公五年魯有仲梁懷故知魯人

孔氏

穎達曰自此至末失也論小斂失禮之事 陳氏澔

曰始死去死衣用斂衾覆之以俟浴既復之後楔齒

綴足畢具脯醢之奠事雖小定然尸猶未襲斂也故

曰未設飾於是設帷於堂者不欲人褻之也故小斂

畢乃徹帷仲梁子謂夫婦方亂者以哭位未定也二

子各言禮意言方亂非也 方氏慤曰人死斯惡之

矣以未設飾故帷堂蓋以防人之所惡也小斂則既設飾矣故徹帷焉若是則帷堂之禮為死者爾豈為生者哉而仲梁子以為夫婦方亂故帷堂則失禮之意遠矣

小斂之奠子游曰於東方曾子曰於西方斂斯席矣小斂之奠在西方魯禮之末失也

正義鄭氏康成曰曾子以俗說非又大斂奠於堂

孔疏

大斂之奠設於室今鄭云堂傳寫誤

乃有席末失謂末世失禮之為也

孔氏穎達曰案士喪禮小斂之奠設於尸東無席
魯之哀末小斂之奠設於西方又有席曾子見時如
此將謂為禮故云小斂於西方其斂之時於此席上
而設奠矣故記者正之云是魯人行禮末世失其法
也方氏慤曰小斂之奠於東方則孝子未忍死其
親之意也

案小斂畢奉尸俵於堂乃奠於尸東當尸右手如其
能食也將大斂徹小斂奠設於序西南當西榮如設

於堂不忍使親須臾無所憑然於西漸神之也大斂
既殯乃設席於輿而奠彌神之也曾子謂於西方而
又言斂斯席謂此小斂即設席於西皆因末俗之失
也秦繼宗謂斂斯席矣是記者語未然

縣子曰綌衰總裳非古也

綌去逆反
總音歲

正義鄭氏康成曰非時尚輕涼慢禮 孔氏穎達曰

綌葛也總布疏者時有喪者不服麤衰但以疏葛為

衰總布為裳故云非古古謂周初制禮時也 陸氏

德明曰綌粗葛布細而疏曰總 方氏慤曰古之五服自斬至總一以麻而各有升數若以綌為衰以總為裳則取其輕涼而已故曰非古也

案儀禮喪服布衰裳牡麻經即葛五月又既葬即除之服有總衰裳總布細而疏五服不用小功雖輕必待三月變麻始改衰而就葛經帶而五月今概用綌總則非禮甚矣

子蒲卒哭者呼滅子皋曰若是野哉哭者改之

正義鄭氏康成曰滅蓋子蒲名惟復呼名

孔疏冀其聞名而反

子皋孔子弟子高柴野哉非之也

孔氏穎達曰此

論哭者呼名非禮之事野不達禮也哭則敬鬼神不復呼名此家哭呼名子皋非之乃改也

杜橋之母之喪宮中無相以為沽也

相息亮反沽音古

正義鄭氏康成曰沽猶畧也

孔氏穎達曰此論喪

須立相導之事禮孝子喪親悲迷不復自知禮節事儀皆須人相導而杜橋家母死宮中不立相侍故時

人謂其於禮為粗畧

夫子曰始死羔裘玄冠者易之而已羔裘玄冠夫子不

以弔

易音亦

正義鄭氏康成曰不以吉服弔喪孔氏穎達曰此

論始死易服小斂後不得吉服弔之事蓋養疾者朝服羔裘玄冠即朝服也始死則易去朝服著深衣記時有不易者又有小斂後羔裘弔者記人引孔子身行之禮以譏當時多失禮也方氏慤曰吉服可以

養疾而不可以居喪故始死則易之不特喪者易之
弔者亦不服也

存疑馬氏晞孟曰弔者在小斂之前猶當服羔裘玄
冠以主人未成服弔者麻經不敢先也故子游裼裘
而弔小斂乃襲裘帶經而入若夫子之羔裘玄冠不
以弔者是言小斂之後也

案家語季桓子死魯大夫朝服而弔子游問而夫子
答之雖始死主人未成服而曰易之則必非羔裘玄

冠也

子游問喪具夫子曰稱家之有亡子游曰有亡惡乎齊
夫子曰有毋過禮苟亡矣斂首足形還葬縣棺而封人

豈有非之者哉

稱尺證反亡音無惡音烏母音無斂
力驗反還音旋縣音玄封依注作窆

正義鄭氏康成曰惡乎齊問豐省之比也形體也還
葬還之言便也言已斂即葬不待三月縣棺謂不設
碑緯不備禮也封當為窆窆下棺也春秋傳作塋人
豈有非之不責於人所不能也 孔氏穎達曰此論

送終所須當辦具也稱猶隨也亡無也夫子言各隨其家計豐薄有無蓋禮有節限設若富家有正禮可依不得過之貧家既無財但使衣衾斂於首足形體不令露見而已斂竟便葬但手縣棺而下之同於庶人也 陳氏澔曰喪具送終之儀物也惡乎齊言何以為厚薄之劑量也毋過禮不可以富而踰禮厚葬也還葬謂斂畢即葬不待日月之期不設碑綵人不非之者以無財則不可備禮也 姚氏舜牧曰稱便

是中道便是禮

存疑王氏安石曰凡禮言封者復土以閉瘞之名爾何用改為窆乎王制庶人不封不樹易以不封不樹為古則周有封樹之制不必下逮庶人

案古篆封字有圭從之土會意即窆字也有圭從土丰諧聲亦作𡵓乃訓高也後混為一鄭氏始改讀窆以別之孔子葬於防封之崇四尺門人葬孔子三斬板而已封彼封指築墳言古葬者不封謂不築土也

周文故有封樹此言縣棺則封自當作窆指下棺言王說非也

司士賁告於子游曰請襲於牀子游曰諾縣子聞之曰汰哉叔氏專以禮許人

賁音奔人名汰又作大音泰

正義鄭氏康成曰時失之也子游當言禮然言諾非也叔氏子游氏孔氏穎達曰此論不可以禮許人之事襲皆在牀當時失禮襲在於地故司士賁告子游子游不據禮答之專輒許諾如禮出於已故縣子

譏之汰自矜大也 陳氏祥道曰君子之於言必則

古昔稱先王則古昔所以本其時稱先王所以本其
人如此則有所受無所專也司士問襲牀之禮而子
游諾之以其不知有所受無所專也 陳氏澔曰禮

始死廢牀而置尸於地及復而不生則尸復登牀襲
者斂之以衣也沐浴之後商祝襲祭服祿衣蓋布於
牀上也飯含之後遷尸於襲上而衣之襲於牀者禮
也後世禮失而襲於地則褻矣司士知禮而請於子

游子游不稱禮而答之以諾所以起縣子之譏也汰
矜大也言凡有咨問禮事者當據禮答之子游專輒
許諾則如禮自己出矣是自矜大也 馬氏晞孟曰
魂氣歸於天體魄歸於地人之所以死也故始死廢
牀欲其近於地不復然後襲於牀

案楊復儀禮圖云喪大記有疾病廢牀之文儀禮則
無然本記云乃卒主人啼兄弟哭設牀第當牖夫既
設牀第於乃卒之後則知疾病時廢牀與喪大記合

然據檀弓曾子易箦反席而歿則不廢牀也記所謂
設牀即喪大記所謂含一牀襲一牀與小斂牀第等
皆非常寢之牀也古謂廢牀寢地冀其受氣以生夫
人將死斷無藉地氣復生之理且地氣沁侵速之斃
耳喪大記所云古即有之亦不可用

宋襄公葬其夫人醯醢百甕曾子曰既曰明器矣而又

實之

醢呼兮反醢音
海甕烏弄反

正義鄭氏康成曰言名之為明器而與祭器皆實之

是亂鬼器與人器 陳氏澂曰夏專用明器而實其半虛其半殷人全用祭器亦實其半周人兼用二器則實人器而虛鬼器

通論孔氏穎達曰此論宋襄公失禮之事案春秋宋襄公卒在僖公二十三年至文公十六年猶有襄夫人在今得云宋襄葬其夫人者蓋襄公初取夫人爾既曰神明之器則當虛也案既夕禮陳明器後云無祭器鄭云士禮畧大夫以上兼用鬼器與人器人鬼

兼用則空鬼而實人士既無人器則亦實明器故既夕禮云壺三醯醢屑又云甒二醴酒也若夏后氏專用明器則分半以實之殷人全用祭器則亦分半以虛之周人兼用則亦實人而空鬼也

存疑馬氏晞孟曰此譏其多於禮可也以為明器而不當實之則非矣豈曾子言殷人之禮有祭器而不必實明器與

案既夕士禮此為諸侯禮有祭器又有明器孔氏實

人空鬼之說自不可易襄公百甕當是既實祭器并明器俱實故曾子譏之馬氏非之過矣且殷人全用祭器何明器之可言

孟獻子之喪司徒旅歸四布夫子曰可也

正義鄭氏康成曰獻子魯大夫仲孫蔑旅下士也司徒使下士歸四方之賻布時人皆貪夫子善其能廉孔氏穎達曰此論喪不貪利之事孟氏家臣司徒敬子稟承主人之意使旅下士歸還四方賻布之餘

蓋四方賻泉布本助喪用今既有餘故歸還之熊氏
謂此司徒獻子家臣左傳叔孫氏之司馬馯戾是家
臣亦有司徒司馬也

存疑吳氏澄曰家臣之賤應無稱司徒司馬者熊氏
說非皇氏謂歸之君而君使司徒歸之者亦非但如
鄭注云旅下士也司徒使下士歸四方之賻布是矣
案周官諸大夫之喪宰夫使其旅帥有司而治之宰
夫者冢宰之下大夫也季孫魯國上卿實兼冢宰之

職司徒乃季孫之下大夫故其旅得為孟獻子之家治喪也

案少牢大夫禮也而有司馬刲羊之文則大夫家有司徒司馬可知吳氏論官制固允而謂季孫之下大夫為孟孫治喪則未必然

讀贈曾子曰非古也是再告也

正義鄭氏康成曰喪禮祖而讀贈賓致命將行主人之史又讀贈所以存錄之曾子言非禮 吳氏澄曰

案士喪禮下篇祖奠畢公賵賓賵其時賵者已致命
於柩凡所賵之物書之於方及次日遣奠畢包牲行
器之後主人之史讀賵若欲使人一一知之前既致
命今又讀之是再告於神也蓋古者但有賵時致命
之禮無後來再讀之理故曾子以為非古 陳氏澠
曰車馬曰賵所以助主人之送葬也既受則書其人
名與其物於方版葬時柩將行主人之史請讀此方
版所書之賵蓋於柩東當前東西面而讀之古者奠

之而不讀周則既奠而又讀焉故曾子以為再告也
成子高寢疾慶遺入請曰子之病革矣如至乎大病則
如之何子高曰吾聞之也生有益於人死不害於人吾
縱生無益於人吾可以死害於人乎哉我死則擇不食
之地而葬我焉

遺於季反又如
字革紀力反

正義鄭氏康成曰成子高齊大夫國成伯高父也

孔疏

齊有國子世本懿伯生
貞孟貞孟生成伯高父

慶遺入請觀其意也革急也

遺慶封之族不食謂不墾畊

秦氏繼宗曰謂地不可
種五穀以供民食也

孔氏穎達曰此論臨死不忘儉之事國氏也齊有
國子高 吳氏澄曰入請入臥內請其遺命也子高
自謂生不能利澤於是無益於人也若死而葬人
所耕墾之地以妨五穀是有害於人矣故擇不可耕
墾之地而葬焉其意慊然不自足其言依於謙儉可
謂賢矣 陳氏澔曰子高謚成革亟也大病死也諱
之之辭

通論方氏慤曰子高之愛人可知矣觀公叔文子樂

瑕丘而欲葬則子高之所得不亦多乎

子夏問諸夫子曰居君之母與妻之喪居處言語飲食

行爾

衍告
旦反

存疑鄭氏康成曰衍爾自得貌為小君惻隱不能至

孔氏穎達曰此論臣服小君儀容之事居處以下

是夫子答辭不云子曰者記人畧也陳氏澣曰君

母君妻雖皆小君皆服齊衰不杖期然恩義則淺矣

故居其喪則自處如此衍爾和適之貌

存異陸氏佃曰喪雖輕惻隱不至則有之未有居之而樂者也子夏失問夫子是以不答

案家語居處上有如之何子曰五字衍爾下有在喪所則稱其服而已九字文義甚明當從之

賓客至無所館夫子曰生於我乎館死於我乎殯

正義鄭氏康成曰仁者不厄人方氏慤曰此言賓

客論語言朋友互相備也應氏鏞曰朋友以義合

謂之賓客者自遠方而至也

案家語至無所館下有死無所殯四字此亦闕文記者約記夫子生平言他國客至有無所館者則夫子曰於我乎館有死無所殯者則夫子曰於我乎殯不忍其無歸覆載生成之心也或曰其至為夫子至也生既館之死亦殯之

國子高曰葬也者藏也藏也者欲人之弗得見也是故衣足以飾身棺周於衣槨周於棺土周於槨反壤樹之

哉

壤而
丈反

正義鄭氏康成曰言皆所以為深邃難人發見之也

國子高成子高也成諡也反覆也怪不如太古也

孔疏

唐虞以上謂之太古易繫辭曰古之葬者厚衣之以薪不封不樹今既封樹故曰怪不如太古而反

封樹之意在於儉非周禮也 孔氏穎達曰此論重

古非今之事子高之意人死可惡故備以衣衾棺槨欲其深邃不使人知今乃反更封壤為墳而種樹以標之哉言不當封壤種樹也 方氏慤曰壤言封土以為墳樹言種樹以為表

通論馬氏晞孟曰古於死者衣之以薪葬諸中野而後世聖人特嚴慎終之禮故瓦棺堅周為不足易之以棺槨無使土侵膚被之以柳翣無使人惡於死凡此皆藏之弗得見者也周官冢人以爵等為之丘封之度與其樹數使知位秩之高下命數之多寡所以遺後世子孫之識非以為觀美者也封之崇四尺孔子之所不廢而國子高非之亦異於禮矣

案子高自葬不食之地而其言葬也又第以藏為說

視周末文勝之習遠矣或子高懲當時有石椁三年
醢醢百甕大害於禮者故作此語與死欲速朽同意
與

孔子之喪有自燕來觀者舍於子夏氏子夏曰聖人之
葬人與人之葬聖人也子何觀焉昔者夫子言之曰吾
見封之若堂者矣見若坊者矣見若覆夏屋者矣見若
斧者矣從若斧者焉馬鬣封之謂也今日而三斬板
而已封尚行夫子之志乎哉

燕烏田反與鄭如字今作
平聲坊音防鬣力輒反

正義鄭氏康成曰封築土為壘堂形四方而高坊形

旁殺平上而長覆謂茨瓦也夏屋今之門廡

孔疏夏家之屋

唯兩下而已無四阿如漢之門廡

其形旁廣而卑斧形旁殺刃上而

長孔子以為刃上難登狹又易為功故從若斧者焉

馬鬣俗間名

孔疏恐燕人不識故舉俗稱以語之馬鬣鬣之上其肉薄封形似之

板蓋

廣二尺長六尺斬板謂斷其縮也三斷止之

孔疏築墳之法

安板側於兩邊用繩約板令立納土板中築之令土與板平斬所約繩更置於見築土上又載土其中三

徧如此其墳乃成

旁殺蓋高四尺其廣袤未聞也詩云縮板

以載尚庶幾也 王氏肅曰言若聖人葬人與則人
庶有異聞得來觀者若人之葬聖人與凡人何異而
子何觀之有故下備述夫子所言四封之異以慰燕
人遠觀之心使以為法也 孔氏穎達曰此一節論
葬夫子封墳之法舍住也燕國人來住子夏家也子
夏歷述孔子之言又引今會古言今孔子墳止用一
日之功儉約如此者是庶幾慕行於孔子平生所志
也孫毓云孔子墓魯城北門外西墳四方前高後下

形似臥斧高八九尺記似誤者孫所見或後人增益

不與原葬同與 陳氏澔曰延陵季子之葬其子夫

子尚往觀之今孔子之葬燕人來觀亦其宜也然子

夏之意以為聖人葬人則事皆合禮人之葬聖人則

未必皆合禮也故語之曰子以為聖人之葬人乎乃

人之葬聖人也又何觀焉蓋謙辭也 馬氏晞孟曰

古之人封之若堂者四方而高難為功而易為虧故

變之為若坊易為功矣然上平猶不免於虧故變之

為若覆夏屋旁廣而卑則難虧矣然必從若斧者功
愈易而虧愈難此所貴於儉者也丘封以爵等為度
而如此異者不失高下之制而已矣

通論陳氏祥道曰孔子以時人之封過泰也故欲從
其殺者而已門人以夫子之志於儉也故一日三斬
板以行夫子之志而已門人於封則儉於披崇練旒
則不儉者儉則行夫子之志不儉則行門人之志行
夫子之志所以救時行門人之志所以尊師也

存疑鄭氏康成曰與及也 孔氏穎達曰子夏謂燕人云若聖人葬人及人葬聖人皆用一禮而子遠來何所觀乎

案與當如王說作平聲鄭注不合語意

婦人不葛帶

正義鄭氏康成曰婦人質不變重者至期除之卒哭變經而已

孔疏經首經也婦人輕首重要故也

孔氏穎達曰此論齊

斬婦人帶要經也葬後卒哭變麻易葛婦人重要不

變所重故不葛帶至期除之卒哭直變經而已大功
以下輕至卒哭並變為葛與男子同 陳氏澔曰禮
婦人之帶牡麻結本卒哭丈夫去麻帶服葛帶而首
經不變婦人以葛為首經易去首之麻經而麻帶不
變所謂不葛帶也既練則男子除經婦人除帶
有薦新如朔奠

正義鄭氏康成曰重新物為之殷奠 孔氏穎達曰
薦新謂未葬中間得新味而薦亡者如朔奠者謂未

葬前月朔大奠於殯宮大奠則牲饌豐也朔禮視大
斂士則特豚三鼎今若有新物及五穀始熟薦於已
者則其禮牲物如朔之奠也大夫以上則朔望大奠
士但朔而不望 應氏鏞曰薦新於廟死者已遠則
感傷或淺薦新於殯其痛尚新則感傷必重朔祭謂
之大奠其禮視大斂薦新亦如之

存疑應氏鏞曰如者謂男女各即位內外各從事而
奠哭之儀如一也是禮之同非其物之同注謂殷奠

恐未然蓋經曰如朔奠非為之也

案士喪禮既殯有朝夕奠有朔奠及月半奠朝夕奠
脯醢朔奠用特豚三鼎視朝夕奠為盛故曰殷朔望
有定期薦新無定期薦新事若微然月令按候載之
蓋孝子因時怵愴之懷恃此以申故重其禮如此注
說未可輕議也況據士喪朝夕奠敘主賓男女之位
甚詳朔奠不及哭位其如朝夕哭位可知若第以如
朔奠為男女之位等則朝夕奠亦然何必曰如朔奠

既葬各以其服除

正義鄭氏康成曰卒哭當變衰麻者變之

孔疏重親各隨所受

而變服

或有除者不視主人

孔疏若三月之親至三月數滿應除者葬竟各自除

不待主人卒哭之變也

陳

氏濤曰葬而虞虞而卒哭

孔氏穎達曰既葬謂

三月葬竟後至卒哭

案此既葬統天子諸侯大夫士庶非必大夫三月而葬也除謂變除之節蓋受服亦必去前服故統曰除也鄭注本該孔疏特舉其一耳

餘論張子曰今人多歷年所而葬者亦當以改葬之
服除蓋古者未葬則主人不除今既除之矣則猶當
從改葬服禮改葬服總久不葬者似難為虞祭以其
無几筵也三日而省墓可也

池視重雷

重直
容反

正義鄭氏康成曰如屋之有承雷也承雷以木為之

用行水

孔疏屋雷入此木中又從木
中而雷於地故此木為重雷

亦宮之飾也柳

宮象也

孔疏生時既屋有重雷以
行水死時柳車亦象宮室

以竹為池衣以青

布

孔疏於車覆鼈甲之下牆帷之上綴竹為之形如籠衣以青布以承鼈甲縣銅魚焉今

宮中有承雷以銅為之 孔氏穎達曰池者柳車之

池也重雷屋承雷也天子則四注四面皆有重雷諸

侯去後餘三大夫唯餘前後二士則唯一在前名之

為池以象重雷方面之數各視生時重雷

案孝子不忍死其親故喪器以生時之具奉之帷荒

既象屋故必設池以象重雷

君即位而為裨歲一漆之藏焉

裨蒲
厯反

正義鄭氏康成曰棨謂柩棺親尸者棨堅著之言也

孔疏謂漆之堅強斃斃然也

天子棨內又有水兕革棺歲一漆之

若未成然藏焉虛之不令

陸氏德明曰令本又作合

孔氏穎達

曰此論人君尊即位得為棺之事君諸侯也言諸侯則王可知人君無少長體尊備物故即位而造棺每年一漆示如未成也不欲令人見故藏焉

存疑孔氏穎達曰鄭注不合一作不令令善也言虛之則不善故藏物於其中一作不合謂不以盖合覆

其上

案言棺之藏但虛之不合不以蓋合覆其上非謂必藏物棺中也作令字非

復楔齒綴足飯設飾帷堂並作父兄命赴者

楔悉節反綴竹劣反

又竹衛反飯煩晚反

正義鄭氏康成曰設飾謂遷尸又加新衣 孔氏穎

達曰此論始死之事復招魂也楔柱也招魂後用角
朽柱亡人之齒令開使含時不閉也綴足者用燕几
綴亡人之足令直使著屨時不辟戾也飯含也設飾
謂襲斂遷尸之時又加著新衣也作起為也自復以

下諸事並起也赴亦復後之事死者生時有親識之人今死則其家宜使人往相赴告也 陳氏澹曰帷堂堂上設帷也六事一時並起故曰並作也

存異鄭氏康成曰父兄命赴謂大夫以上也士主人

親命之

孔疏士喪禮孝子自命赴者

孔氏穎達曰帷堂謂小斂

時也

案士喪禮曰乃赴於君主主人西階東南面命赴者拜送此赴君之禮也餘無主人命赴之文蓋始死時孝

子悲痛迷瞶故諸父諸兄代為命赴君尊故親命而拜送之也鄭誤以士喪禮命赴為凡赴皆然而因以為士大夫尊卑之別非也 又案士喪禮始死設奠即曰帷堂不待小斂

君復於小寢大寢小祖大祖庫門四郊

正義鄭氏康成曰尊者求之備也亦他日所嘗有事孔氏穎達曰此明人君禮備復處多也君王侯也周禮夏采以冕服復於太廟其小廟則祭僕復之小

寢大寢則隸僕復之四郊夏采復之諸侯則小臣復
馬氏晞孟曰寢所居處之地祖所有事之地門所
出入之地郊所嘗至之地君復必於此者蓋魂氣之
往亦未離生時熟習之地也觀此則死生之說可知
矣 陳氏澔曰天子之郭門曰皋門明堂位言魯之
庫門即天子皋門是庫門者郭門也

存疑孔氏穎達曰前曰廟後曰寢爾雅云室有東西
廂曰廟無東西廂而有室曰寢小寢謂高祖以下之

寢大寢謂天子始祖諸侯大祖之寢也

案寢君寢也春秋公薨於小寢周官六寢注云王之
大寢一小寢六宮寢為人君居處之地故復始於此
士喪禮所謂復者升自東榮中屋是也由宮寢至於
廟由廟至於門由門至於郊先近後遠其序如此鄭
注周禮隸僕掌五寢掃除糞洒誤為廟寢此疏本其
說言之豈有舍其現在居處之六寢於廟又先寢後
廟之理當以馬氏說為是

喪不剥奠也與祭肉也與

剥邦角反與音餘

正義鄭氏康成曰剥猶裸也有牲肉則巾之

孔疏士喪禮小

斂陳一鼎既斂奠於尸東祝受巾巾之是牲肉巾之也

為其久設塵埃加也脯

醢之奠不巾

孔疏始死脯醢醢酒奠於尸東無巾又殯後朝夕乃奠醢酒脯醢如初設不巾

是脯醢不巾也

孔氏穎達曰此論祭肉不可露見之事與

是語辭謂喪不裸露奠者為有祭肉也無祭肉即得

裸露

案或云剥者徹之疾也祭肉之徹以疾為敬故詩曰

諸宰君婦廢徹不遲惟喪之奠則藉以依神故朝奠至夕乃徹夕奠至朝乃徹言此喪之不徹奠者孝子不死其親如待其食而猶未食之至情也與寧比以神道事者之祭肉以疾徹為敬也與玩文似當如此解其說與注別存之以備一義

既殯旬而布材與明器

正義鄭氏康成曰木工宜乾腊且豫成材槨材也

孔氏穎達曰此論葬禮須豫暴之事布班也殯後十

日班布告下覓槨材及送葬明器之材士喪禮筮宅
吉左還槨獻明器之材於殯門外是也 王氏安石
曰布陳也 陳氏澔曰布者分列而暴乾之也

案士喪禮有獻材獻素獻成三節在筮宅後以已成
者言此殯後十日則庀材之始布字三說不同然亦
彼此相足蓋惟告下覓材乃能陳布暴乾之也

朝奠日出夕奠逮日

逮音代或
大計反

正義鄭氏康成曰陰陽交接庶幾遇之

吳氏澄曰陰闇
陽明出者由闇

而明陰交接陽也及日將入由明而闇陽交接陰也
奠者所以聚死者之神死而神混於天地陰陽之中
故於天地陰陽交接之際求之

方氏慤曰逮日者及日也於日未
沒之時為及日矣朝奠以象朝時之食夕奠以象夕
時之食孝子事死如事生也

案此二語當在喪不剝奠上士喪禮朝哭先徹宿奠
乃設朝奠設奠時有燭者以奠設室中雖日出猶闇
也

父母之喪哭無時使必知其反也

正義鄭氏康成曰使謂既練反必有祭 孔氏穎達
曰禮哭無時有三種一是初喪未殯之前哭不絕聲
二是殯後除朝夕哭之外廬中思憶則哭三是小祥
之後哀至而哭或一日二日而無復朝夕之時也此
謂小祥後君使之還家當必設祭告親之神令知其
反亦出必告反必面之義也

存疑鄭氏康成曰或時為君服金革之事

辨正孔氏穎達曰禮運云三年之喪期不使則期外

可使也而曾子問云卒哭服金革之事無辟此魯侯
有為為之也卒哭而使非正禮也

練練衣黃裏縗緣葛要經繩屨無紃角瑱鹿裘衡長祛

祛裼之可也

縗元絹反緣悅絹反要一遙反經大結反
紃其俱反瑱吐練反衡依注作橫華彭反

祛起魚反一
音丘據反

正義鄭氏康成曰黃之色卑於縗縗縗之類明外除
也瑱充耳也吉時以玉人君有瑱衡當為橫字之誤
也祛謂袞緣袂口也練而為裘橫廣之又長之又為

祛則先時狹短無祛可知裼表裘也有祛而裼之備
飾也吉時麕裘玉藻曰麕裘青豻袞絞衣以裼之鹿
裘亦用絞乎 孔氏穎達曰練小祥也小祥而著練
冠練中衣故曰練也練衣者練為中衣黃裏者黃為
中衣裏也正服不可變中衣非正服但承袞而已故
小祥而為之黃袷裏也縗緣者縗為淺絳色縗是赤
色其色華美黃雖是正色質卑於縗爾雅一染謂之縗
三染謂之纁故鄭言纁類也緣謂中衣領及袷緣也

裏用黃而領緣用緇者領緣外也明其外除故飾見外也葛要經者小祥男子去首經唯餘要葛也繩屨者父母喪菅屨卒哭受齊衰蒯屨至小祥受大功繩麻屨也紬屨頭飾也吉有喪無角瑱者初喪無瑱小祥微飾以角為之冬時吉凶衣裏皆有裘吉時則貴賤有異喪時則同用大鹿皮為之小祥之前裘狹而短袂又無祛小祥稍飾故更橫廣又長之且為祛如此三法也裼謂裘上又加衣也為吉轉文故加裼

之可也明小祥時外有衰衰內有練中衣中衣內有
裼衣裼衣內有鹿裘鹿裘內自有常著襦衣也

通論呂氏大臨曰斬疏總大功小功總錫皆曰衰喪
正服也練麻皆曰衣喪變服也至親以期斷加隆而
三年故加隆之服者正服當除有所不忍故為之變
服以至於再期也斬衰之冠鍛而勿灰錫則總而加
灰錫則事布而不事縷服雖輕而衰在內竊意練衣
之升當如功衰加灰事布當如錫有緣與裏當如衣

衰則無緣與裏故比功衰則輕功衰卒哭所受比麻衣則重大祥麻衣麻衣吉服也情文之殺義當然也

諸侯之喪慈母公子為其母皆無服使不可純凶而占筮除喪不當受弔昔之人皆變用練冠以從事則練冠者非正服明矣惟鄭氏功衰為既練之後功衰自是卒哭所受六升之服正服大功七升則六升成

布所可為功不可皆為練服

案大功降服七升正八升義九升為父既練衰

七升故曰功衰若葬卒哭止受以成布六升不得名功衰

首經除矣七升之冠六

升之哀皆易而練矣屨而繩矣所不變者要經與杖而已蓋天地已易四時已變哀亦不可無節故從而多變也 馬氏晞孟曰哀痛至甚則耳無聞目無見也而哀殺則能有聞矣故又為角瑱以充之

餘論朱子曰菅屨疏屨今不可考今畧以輕重推之斬衰用今草鞋齊衰用麻鞋可也麻鞋今卒伍所著者 吳氏澄曰衣自肩上直垂至下為從袖自衣側旁達左右為橫居喪之表其橫袖短則左右盡處不

露見於外練後漸文則橫長其袖與吉裘同前裘雖有裼但裼衣之正身而不至袖練後則裼衣掩至袖口可也

案裘以輕為美鹿大麕小是鹿裘粗而麕裘精也雖居喪冬必鹿裘禦寒以保身也至練就此稍加飾焉有殯聞遠兄弟之喪雖總必往非兄弟雖鄰不往所識其兄弟不同居者皆弔

正義鄭氏康成曰雖總必往親骨肉也雖鄰不往疏

無親也就其家弔之成恩舊也 皇氏侃曰所識其兄弟不同居者皆弔此別更起文不連有殯之事

孔氏穎達曰此論哭弔之事所識謂非兄弟又非疏外平生知識往來今若身死其兄弟雖不同居亦就往弔之以死者與我有恩舊也兄弟不同居尚往弔之則死者子孫就弔可知舉疏以見親也 方氏慤曰總最服之輕者服之輕猶必往況其重者乎同姓之恩隆也鄰最居之近者居之近猶不往況其遠者

乎異姓之恩殺也

存異皇氏侃曰所識者謂識其死者之兄弟是小功以下之親既識兄弟雖不同居者皆一一就弔之

案三年之喪不弔正謂不弔鄉鄰非兄弟之喪亦不往也雜記三年之喪雖功衰不弔如有服而將往哭之則服其服而往此經云雖總必往正謂服其總而往也又子張死曾子有母之喪齊衰而往哭之曰我弔也與哉蓋謂哭死而非弔生也則有殯不可弔所

識之喪矣當以皇氏不連有殯為是至所識當指死者皇氏謂識死者之兄弟則未然

天子之棺四重水兕革棺被之其厚三寸槨棺一梓棺二四者皆周棺束縮二衡三衽每束一柏桴以端長六

尺

重直龍反被皮寄反厚胡豆反
杙羊支反梓音子衽而審反

正義鄭氏康成曰尚深邃也諸公三重諸侯再重大

夫一重士不重

孔疏天子四重上公三重去水牛餘
兕杙屬大棺侯伯子男再重又去兕

餘杙屬大棺大夫一重又去杙餘屬大
棺也士不重又去屬惟單用大棺也

水兕革棺謂

以水牛兕牛之革為棺被革各厚三寸

孔疏水兕二皮並不能厚

三寸故合被之令厚三寸

合六寸也此為一重枕棺所謂裨棺也

爾雅曰楨杙也

孔疏此為二重

梓棺二謂屬與大棺也

孔疏屬三

重大棺四重凡五物

周市也凡棺用能濕之物衡亦當為橫社

今小要社或作漆或作髹

孔疏小要其形兩頭廣中

陳氏澔曰如今之

銀則子不言何物其亦木乎

以端題湊其方蓋一尺

孔疏天子梓材每段長六

尺而方一尺天子以下庶人以上鄭注喪大記具之知其方一尺者以庶人四寸之棺五寸之梓梓厚於棺一寸君大棺八寸君謂諸侯則天子之棺或當九寸其梓厚一尺也梓材並皆從下壘至上始為題湊

漆鄉也言木之頭相鄉而作四阿也

孔氏穎達曰此論天子以下棺

槨厚薄長短之事天子大棺厚八寸屬六寸槨四寸又二皮六寸合二尺四寸上公去水牛之三寸合二尺一寸諸侯又去兕牛之三寸合一尺八寸列國上卿又除梲之四寸合一尺四寸大夫大棺六寸屬四寸合一尺士則不重但大棺六寸故庶人四寸矣二皮能濕故最在裏近尸梲亦能濕故次皮諸侯無革則梲親尸梲棺之外又有屬棺屬棺之外又有大棺

大棺與屬棺並用梓故云梓棺二也四者皆周者謂四重之棺上下四方皆周币也惟槨不周下有茵上有抗席故也古棺木無釘故用皮束合之縱束者用二行橫束者三行衽每束一者棺不用釘先鑿棺邊及兩頭合際處作坎形以小要連之令固棺束並相對每束之處以一行之衽連之若豎束之處則豎著其衽以連棺蓋及底木使與棺頭尾之材相固也天子槨用柏諸侯松大夫柏士雜木鄭注方相職云天

子檟柏黃腸為裏

胡氏銓曰以柏木黃心累於棺外謂之黃腸

而表以石

馬端猶頭也積柏材作檟並葺材頭故曰以端 陳

氏澔曰衣之縫合處曰衽以小要連合棺與蓋之際故亦名衽 陸氏佃曰此不數檟故曰四重

案檟材天子大夫同而諸侯異者於近別嫌也

天子之哭諸侯也爵弁經紼衣或曰使有司哭之為之

不以樂食

紼一作緇一作純同側其反

正義鄭氏康成曰天子服士之祭服以哭之明為變

也

胡氏銓曰諸侯薨在國天子遙哭之故服士服

周禮王弔諸侯弁經總衰

天子至尊不見尸柩不弔服麻不加於采此言經衍

字也時人間有弁經因云之爾使有司哭之非也哀

戚之事不可虛不以樂食蓋在殯斂之間

孔疏鄭以意斷不用

樂之期也

孔氏穎達曰此論天子哭諸侯之事遙哭之

故不服總衰而服爵弁紂衣為之不以樂食此是記

者之言非復或人之說也天子食有樂今哭諸侯故

食不復奏樂 陳氏澔曰諸侯薨而赴於天子天子

哭之 方氏慤曰爵弁其色如爵紂衣音緇以其色如之

通論陸氏佃曰禮記無韋弁周官無爵弁韋弁即爵弁也周官無綦弁尚書無皮弁綦弁即皮弁也綦弁爵弁言色韋弁皮弁言物

案春官司服天子為諸侯總服此記以為爵弁紂衣先儒皆以遙哭言之豈臨喪則弔服遙哭不弔服邪五服之國天子多不能臨喪則為諸侯總衰服於何

時乎蓋純絲也總言細如絲則紂服即總衰也服間公為卿大夫錫衰以居出亦如之則天子為諸侯總衰以居出亦如之矣特當事弁經不當事但弁而不經耳春秋王室卑則時且有弁而哭者故記者因記之又春官司服疏君為臣弔服既葬除之諸侯五月而葬王使人會葬則未葬以前皆不以樂食也春秋諸侯之葬或渴或慢則葬期未可必故鄭注殯斂之間言蓋以疑之孔謂鄭以意斷則未確可知已

天子之殯也，敢塗龍輅，以槨加斧於槨上，畢塗屋。天子

之禮也。

敢，才官反。
輅，勑倫反。

正義鄭氏康成曰：敢，木以周龍輅如槨而塗之。天子殯以輅車畫轅為龍斧，謂之黼白黑文也。以刺繡於繆幕加槨以覆棺，已乃屋其上，盡塗之。孔氏穎達

曰：此論敢塗為古天子殯法也。敢，叢也。謂用木叢棺而四面塗之。故云敢塗龍輅。殯時用輅車載柩而畫轅為龍也。以槨者，題湊敢木象槨之形也。斧謂繡覆

棺之衣為斧文也先葢四面為槨使上與棺齊而上猶開也以棺衣從槨上入覆於棺故云加斧於槨上也畢盡也斧覆既竟又四注為屋以覆於上而下四面盡塗之 陳氏澔曰案葢塗龍輶是輶車亦在殯中非脫去輶車而殯棺也 吳氏澄曰葢木以周龍輶即所謂槨也鄭氏謂之如槨者釋此槨字所以名為槨之義蓋槨猶郭也外城周於內城者為郭故外棺周於內棺者亦名為槨其義如外城之郭也

案此節以散塗龍輜以槨為句以如也葬時有槨此殯時叢木亦如之下又詳其法言四旁叢木與棺平乃於棺上加斧幬覆於棺上叢木皆題湊中高四周卑如此既畢而後塗之則成屋之四注矣

唯天子之喪有別姓而哭

別彼列反

正義鄭氏康成曰使諸侯同姓異姓庶姓相從而為位別於朝覲來時朝覲爵同同位

孔疏朝覲爵同同位則不分別同姓

異姓然覲禮諸侯受舍於廟同姓西面異姓東面者覲禮先公而後侯先侯而後伯是亦爵同同位但就

同姓之中
先爵尊爾

孔氏穎達曰此論哭天子之事鄭注周

禮云異姓謂王昏姻甥舅庶姓謂與王無親者

案周之宗盟異姓為後故哭同姓先異姓後庶姓則
尤後也若諸侯則子入卿大夫序入而哭不分同異
姓矣

魯哀公誄孔丘曰天不遺耆老莫相予位焉嗚呼哀哉

尼父

誄力軌反耆巨支反
相息亮反父音甫

正義鄭氏康成曰誄其行以為諡也莫無也相佐也

言孔子死無佐助我處位者 孔氏穎達曰此論哀

公誄孔子之事孔子以哀公十六年夏四月己丑卒

天不遺耆老以下誄辭也遺置也耆老謂孔子也嗚

呼哀哉傷痛之辭也父字也大夫之美稱也 陸氏

佃曰據左傳所錄公誄之曰旻天不弔不憇遺一老

俾屏余一人以在位不脩春秋之辭也今記脩之如

此 朱子曰誄者哀死而述其行之辭 陳氏澠曰

稱孔丘者君臣之辭 姚氏舜牧曰生不能宗其道

於其死也誄之其亦所謂虛辭也與

存疑鄭氏康成曰尼父因其字以為之諡 孔氏穎

達曰尼諡也

案說見戰乘丘
且諡法無尼

國亡大縣邑公卿大夫士皆厭冠哭於大廟三日君不

舉或曰君舉而哭於后土

厭于葉反
大音泰

正義鄭氏康成曰軍敗失地以喪歸也厭冠今喪冠

其服未聞后土社也 孔氏穎達曰此論人君為國

致憂之事公孤也國既失地是諸侯無德所招故諸

臣皆著喪冠而哭於君之大廟三日失地為先祖所
哀故在廟也臣既於廟三日哭故君亦三日不舉樂
又有或者言亦舉樂而自於社中哭之社主土故也

庾氏蔚之曰舉謂舉饌周禮膳夫王日一舉

案王制云

天子食日
舉以樂

辨正應氏鏞曰哭於大廟者傷祖宗基業之虧損哭
於后土者傷土地封疆之腴削也不舉自貶損也曰
君舉者非也

案周禮大司馬若師不功則厭而奉主車鄭注厭喪
冠也左傳秦伯素服郊次鄉師而哭則哭之服其素
服與

孔子惡野哭者

惡鳥路反

正義鄭氏康成曰為其變衆周禮銜枚氏掌禁詔呼
歎鳴於國中者行歌哭於國中之道者 張子曰有
服者之喪不哭諸家而哭於野是惡凶事也所知自
當哭於野又若奔喪者安得不哭於道

存異孔氏穎達曰哭非其地謂之野方氏慤曰子蒲卒哭者呼滅子皋曰若是野哉孔子之所惡者以其如此故家語之文連言之

辨正陳氏澣曰哭所知於野必設位而帷之以成禮此或郊野之際道路之間哭非其地又且倉卒行之使人疑駭故惡之也孔氏方氏說恐未然

未仕者不敢稅人如稅人則以父兄之命

稅始銳反又吐外反

正義鄭氏康成曰不專家財也稅謂遺於人孔氏

穎達曰此論人子之法稅人謂已仕者也雖得遺人亦必當稱父兄以將之 陳氏澣曰未仕者身未尊

顯故內則不可專家財外則不可私恩惠也或有情義之所不得已而當遺者則稱尊者之命而行之

案孔

陳二說對舉乃
脩故並存之

士備入而后朝夕踊

正義鄭氏康成曰備猶盡也國君之喪嫌主人哭入則踊 孔氏穎達曰此論君喪羣臣朝夕哭踊之事

嗣君雖先入即位哭必待諸臣皆入列位畢後乃俱踊也士卑最後故舉士入為畢也所入有前後孝子哀深故前入踊必相視以為節故俟齊也

案士喪禮朝夕哭門外主人後即位而先入門哭然後賓以次入其踊則又以徹者奠者之升降為節是士入後然後徹與奠以為踊節也

祥而縞是月禫徙月樂

編古老反禫大感反樂音岳

正義鄭氏康成曰縞冠素紕也徙月樂言禫明月可

以用樂 孔氏穎達曰祥大祥也縞冠素紕大祥日著之故小記云除成喪者其際朝服縞冠既禪徙月而樂作禮之正也 方氏慤曰玉藻縞冠素紕既祥之冠是月禪徙月樂者魯人朝祥而莫歌孔子以為踰月則其善者以此

君於士有賜帝

帝音亦

正義鄭氏康成曰帝幕之小者所以承塵賜之則張於殯上大夫以上幕人職供焉 孔氏穎達曰賜恩

賜也士惟有君恩賜之乃得有帟也

案天官幕人大喪共帷幕幄帟綬鄭謂在旁曰帷在上曰幕帟在幕及幄中坐上承塵幄帟皆以繪為之大喪王禮故帷幕帟具供若士則第有帷喪大記所謂塗上帷之是也帟則惟賜而後有之蓋與夷槃賜冰同



欽定禮記義疏卷十一



總校官無吉士臣侍 朝

校對官檢討臣龔大萬

膳錄監生臣朱懷玉